






502410

502


502












































1566

44.<sup>e</sup> fol. in 12.

## L'HISTOIRE

MEMORABLE DE  
LA CONVERSION DEIean Guy parricide, & la constance  
de sa mort: natif de Chastillon sur  
Loing, & executé audict lieu.

ES A I E 55.

*Ma Parole ne retournera point à moy en vain:  
mais fera tout ce que i'auray voulu, & pro-  
sperera es choses esquelles l'ay enuoyee.*

Le curieux qui lit & rien n'entend,  
Semble celuy qui chaste & rien ne prend:  
En lisant donc (si voulez estre instruits)  
Laissez la fucille, & retenez les fruiets.

A O R L E A N S,

Par Eloy Gibier, Imprimeur  
de ladicte ville.

M. D. LXVI.

THE NEWBERRY  
LIBRARY

# AV LECTEUR

CHRESTIEN,

Salut.

Case

F

39

326

1566 Lh

Comme il seroit à desirer (ami Lecteur) selon le souhait mesme du Sage Athenien, que parricide, ni autres cas semblables n'auins-  
sent iamais entre nous: ainsi parauenture seroit  
il expedient, quand ils sont auenus, & punis  
selon leur enormité, que la memoire, tant du  
forfait que de la rigoureuse punition ensuiuite,  
fust aussi tost esteinte & amortie, comme l'e-  
xecution de la Iustice a cessé. Mais puis que par  
la malice de Satan, qui prend son passetemps à  
tels ieux, & l'imprudence des hommes s'aban-  
donnans à luy, & fuyans la doctrine de salut,  
ces crimes si execrables quelques fois se cōmet-  
tent entre nous, il ne se peut faire, veu qu'ils  
meritent estre punis exemplairement, & de  
tourment conuenable à la grādeur du malfait,  
que la souuenance d'iceux ne soit longuement  
empreinte en l'entendement, & de ceux qui les  
auront veus, & de ceux qui les auront ouïs ra-  
conter à leurs peres ou ayens. Puis donc que  
nous ne pouuons euitier que telles choses ne se  
facent, & que le bruit & cognoissance ne s'es-  
tende en plusieurs endroits, nostre deuoir est  
d'en faire nostre profit, & rendre le diable con-



fus, en tirant vn bon ordre du desordre qu'il  
 aura voulu mettre en auāt, & du mal, le bien.  
 Principalement deuons-nous tascher à cela,  
 quand auec nostre bien la gloire de Dieu est  
 coniointe. Et certes ceste-ci est, ie ne diray pas la  
 principale, mais la seule cause qui nous a in-  
 duits à la publication de ceste histoire. En la-  
 quelle iacoit qu'aucuns personnages notables,  
 desquels Dieu s'est serui pour parfaire son œu-  
 ure, soyent specifiez & nommez, toutesfois ils  
 n'ont en ceci eu aucun esgard à leur gloire, estās  
 gens si bien qualifiez & cognus pour leurs  
 vertus, qu'ils n'ont besoin d'autre trompette de  
 leurs louanges. Parquoy, Ami qui lis ceste hi-  
 stoire, si tu es pere, fay-la souuent resonner aux  
 aureilles de tes enfans, afin qu'en icelle, comme  
 en vn miroir, ils voyent quels fruiets prouien-  
 nent des religions, non songneuses d'apprendre  
 de bonne heure aux enfans la crainte de Dieu,  
 qui est la source des bonnes œuvres. Ce qui a-  
 uiēt en toutes celles, où la Parole de Dieu est ou-  
 reiettee du tout, ou impurement annoncee. Toy  
 aussi mon frere en nostre Seigneur Iesus Christ,  
 poure pecheur repentant, si d'auenture ta con-  
 science est espouuantee par remors de quelques  
 execrables forfaits, pren courage, & t'assure en  
 la bonté & misericorde infinie de Dieu, qui  
 appelle non seulement à quelque repentance,

4  
mais qui plus est, à sa cognoissance & participation de son heritage, des creatures si malheureuses & detestables, que les hommes mesmes ne peuuent endurer, & (chose qui te doit bien consoler) au temps qu'ils sembloient estre du tout liurez à Satan. Car puis quil ne desdaigne tels pecheurs, confie-toy qu'aussi il te recevra, quand desplaisant de tes iniquitez, tu luy requerras pardon avec vraye & viue foy. Voila le fruit que nous desirons & requerons à Dieu estre recueilli de ceste Histoire. Auquel soit gloire & honneur à iamais.



5

L' HISTOIRE MEMORABLE  
de la conuersion de Iean Guy parricide,  
& la constance de sa mort: natif de Chastil-  
lon sur Loing, & executé audict lieu.



Ly auoit en la ville de  
Chastillon sur Loing vn  
ieune homme, qu'on ap-  
pelloit Ieã Guy, fils d'E-  
mé Guy, marchant bon-  
netier de son estat: le-

quel par faute de bonne instruction &  
chastiment que doiuent les peres &  
meres à leurs enfans, auoit esté toute sa  
vie fort desbauché & grãd coureur. Ad-  
uint vn Samedi penultieme iour de Sep-  
tembre, mil cinq cens soixãte cinq (iour  
du marché de ladicte ville) que ledict  
Iean Guy, apres auoir par le commãde-  
ment de son pere dressé leur estau en la  
place publique, pour y faire vente de la  
marchandise concernant leurdict estat,  
se desbaucha selon sa coustume: & ne  
reuint en la maison qu'au soir bien tard.  
Arriué qu'il fut, son pere se courrouça  
bien fort à luy, de ce qu'il ne l'auoit veu  
de tout le iour, & le reprenât de ses des-  
bauchemens, luy dist en presence de sa

A.iii.

femme & d'un sien seruiteur, qu'il seroit finalement contraint de le chasser hors de sa compagnie, puis qu'il ne se vouloit autrement chastier de ses mauuaises complexions. A quoy le fils plein d'orgueil, respondit fort audacieusement, qu'il estoit tout prest de s'en aller : voire dès l'heure mesme, pourueu qu'on luy baillast ses accoustremens. Ceste dispute dura assez longuemēt, & iusques à tant que le pere fut couché : lequel fut contraint de menacer son fils pour le faire taire, tant il repliquoit fierement contre luy. Mais voyant qu'il n'y profitoit rien, & se sentāt par trop importuné de ses longues & orgueilleuses repliques, se leua en colere de son liēt, pour aller chastier l'arrogāce & temerité de son fils. Quoy voyāt ledict fils, & que son pere venoit courroucé contre luy pour le battre, eut soudain recours à son espee, qui estoit en la mesme chambre où ils estoient, & se rebellant contre son pere, luy donna de l'espee tout au trauers du corps : duquel coup il tomba soudainement à terre, s'escriant à haute voix qu'il estoit mort. A l'estonnement de ce cri furuindrent incontinent les voisins, & tost a-

pres la Iustice, lesquels trouuerēt le po-  
 ure pere estendu sur la place, & n'atten-  
 dant plus que la mort, laquelle sensuiuit  
 bien tost apres. Fut aussi trouué l'espee  
 encore toute sanglante aupres du fils qui  
 se chauffoit: auquel le pere meu de com-  
 passion, & oubliant la cruauté qu'il auoit  
 receuë de luy, auoit ia dit plusieurs fois,  
 Sauue-toy, sauue-toy mon fils: ie te par-  
 donne ma mort. Ayant aussi vŕé la mere  
 de mesme persuasion pour le faire eua-  
 der, mais comme il pleut à Dieu le rete-  
 nir par vn iuste iugement, il n'eut onc la  
 force de desloger. Interrogé qu'il fut par  
 la Iustice, de la cause qui l'auoit meu à  
 tuer ainsi miserablement son pere, res-  
 pondit en somme qu'il n'auoit tasché à  
 le tuer: ains que la seule colere de son-  
 dict pere auoit esté cause que luy-mes-  
 me s'estoit precipité dans son espee, la-  
 quelle il n'auoit prise que pour euitel tel  
 courroux, & par ainsi taschoit à se iusti-  
 fier. Soudain on fit le proces verbal: pē-  
 dant lequel fut demādē à la mere si elle  
 se vouloit rendre partie contre son fils, à  
 quoy elle respondit que non. Estant dōc  
 trouué là dedans ledict parricide, il fut  
 incontinent apprehendé par la Iustice,



& mené en la prison de la ville. Bien tost  
 apres ceux de la Iustice communiquerét  
 tout ce faict à Monseigneur l'Amiral,  
 qui pour lors estoit en sa ville de Cha-  
 stillon: lequel leur commanda d'en faire  
 vne bonne & brieue iustice, & qui fust  
 exemplaire à tous: dōt gueres de temps  
 apres ne se passa que son proces ne fust  
 parfait & mis à fin, & sentence de mort  
 donnee contre luy, apres auoir toute-  
 fois gardé toute solennité de Iustice. Or  
 par les informations de sondict proces,  
 les tesmoins deposoyent entre autres  
 choses, que le pere & la mere auoyent  
 longuement vescu ensemble en bonne  
 reputation & amitié, comme gens de-  
 bonnaires & paisibles, & qui trauail-  
 loyent diligemment de leur estat pour  
 la pouruoyance & necessité de leur fa-  
 mille. Qu'ils auoyent esleué leur fils ais-  
 né (dont il est ici parlé) en toute douceur  
 & humanité, & l'auoyent bien repris de  
 ses desbauchemens: mais non pas cor-  
 rigé comme il appartenoit. Outre ces  
 informations, il s'est trouué par le tes-  
 moignage de certains personages, gés  
 de bien, ce que dessus estre vray, quant à  
 leur conuersation ordinaire: mais au de-  
 me-

meurant, que c'estoyent poures gens, bien fort rustiques, & sans aucune intelligence quant à la vraye pieté (comme le porte aussi l'ignorance de ceux qui sont nourris en la Papauté, comme ils estoient.) Deposoient aussi les tesmoins, quant au fils, qu'il auoit esté toute sa vie fort desbauché, & mesprisant ordinairement les reprehensions de sesdicts pere & mere: qu'il les laissoit à chacū coup pour aller courir çà & là à son plaisir, & ne retournoit que quand bon luy sembloit. Neantmoins tout cela n'auoit peu empescher, que le pere & la mere ne l'eussent tousiours receu en toute douceur, toutes les fois qu'il estoit retourné à eux. Le Samedi ensuiuant, huietieme iour d'apres qu'il eut commis ce meschant & malheureux acte, sa sentence luy fut prononcee par la Iustice de Chastillon, laquelle sentence portoit telles peines: C'est assauoir, qu'il auroit le poing dextre (duquel il auoit occis son pere) couppé sur vn eschaffaut, en la place publique de ladicte ville, & deuant la maison de sondict pere: Qu'il seroit tenaillé tout vif aux deux mammelles, de tenailles ardentes de feu, & apres seroit

illec pendu par les pieds à vne potence, & estranglé d'une pierre, du poids de six vingts liures, qu'on luy attacherait au col : Qu'il demeureroit ainsi pëdu en ladicte place, l'espace de vingt quatre heures, puis seroit porté pour demeurer ainsi pendu à tousiours, à la iustice ordinaire de ladicte ville. Ceste sentence luy estant ainsi prononçee, il en appella : estant persuadé à ce faire par vn meschât garnemët de faussaire, qui pour ses mesfaits auoit receu sentence avec luy pour estre enuoyé aux galeres, & de laquelle aussi il auoit appellé. Ce mesme iour, ainsi que Monseigneur l'Amiral estoit sur son partement pour aller à Courtenay, faire la monstre de sa compagnie, on luy annonça comment lesdicts prisonniers auoyent appellé de leurs sentences. Parquoy il ordonna qu'on les menast diligemmët à Paris: & en attendant, on les remit en la grosse tour du chasteau, où ils auoyent esté mis au parauant, pource qu'on rhabilloit les prisons de la ville. Or apres ces choses, le bruit fut incontinent entendu par toute la maison de Monseigneur l'Amiral, que les prisonniers estoient appellans, &

qu'on les auoit remis dedans la tour. Ce qu'ayant entédu Madamoiselle de Cha-  
 stillon (fille aisnee de Monseigneur l'A-  
 miral, aagée dedix ans) il luy prit enuie  
 de les aller voir. Parquoy s'estât accom-  
 pagnée de sa gouuernante, & autres ses  
 damoiselles, mōta en la tour où estoÿēt  
 lesdicts prisonniers, lesquels elle salua  
 fort humainement (selon que porte son  
 naturel, fort doux & gracieux) & leur fit  
 entendre qu'elle estoit allée là pour les  
 consoler. Mais cōme sage & respectueu-  
 se (entât que porte son aage) laissa pren-  
 dre pour cest effect la parole à sadicte  
 gouuernante, & au precepteur de Mes-  
 sieurs ses freres, qui aussi l'accōpagnoit:  
 lesquels adresserent principalement  
 leurs propos audict parricide, tendans  
 afin de l'amener à quelque sentiment de  
 son peché. Mais voyans qu'il n'en auoit  
 aucune apprehension, non plus que d'v-  
 ne petite faute, laquelle Dieu & les hom-  
 mes oublieroient facilement, luy re-  
 monstrerent la grandeur de son peché,  
 & la rigoureuse vengeance que Dieu en  
 prendroit: non seulement en ceste vie  
 presente par le moyē du Magistrat, mais  
 aussi apres la mort, par vne damnation



eternelle du corps & de l'ame, si autrement il ne vouloit recognoistre son péché, afin de recourir à la miséricorde de Dieu, qui seroit tousiours prest de luy faire merci, toutes les fois que d'un vray sentimēt & desplaisir de ses fautes il l'en requerroit en assurance d'estre exaucé. Mais pour toutes ces remonstrances il ne fit iamais aucune demonstration d'en estre esmeu, tant peu que ce fust, ains disoit tousiours qu'il estoit appellant, & qu'il n'auoit tué son pere, mais que le fourreau de son espee, estât tombé en terre, son pere s'en estoit luy-mesme enfermé : de sorte que voila tout ce qu'on peut gagner pour ceste fois avec luy. Peu de temps apres que Mademoiselle de Chastillon se fut retiree, Dieu mit pareillement au cœur de Madame l'Amirale sa mere, d'aller visiter lesdicts prisonniers, où elle fut accompagnée d'aucuns de ceux qui ia auoyent assisté à Mademoiselle de Chastillon, nommément dudict precepteur des enfans de Monseigneur l'Amiral & d'elle, ensemble d'un de ses maistres d'hostels, & autres de sa maison. La prison ouuerte, furent aduertis iceux prisonniers que



c'estoit Madame l'Amirale, qui les alloit visiter, pour les consoler & admonester de leur salut. A quoy ceste vertueuse Dame (selon qu'elle est charitable & debonnaire, & vn vray miroir & exemple de pieté) s'employa de prime face tant qu'elle peut, par bonnes & sainctes exhortations qu'elle leur fit, & adressoit son propos principalement audict paricide, tédant afin de l'amener à vn vray sentiment de son peché: qu'elle aggrauoit d'autant plus, qu'elle voyoit que ce pource malheureux ne faisoit aucun semblant d'en estre touché. Je ne suis (luy dit elle entre autres propos) ici venue pour vous diuertir de vostre appel, ains pour vo<sup>9</sup> aduertir & prier, qu'employez bien le temps qu'il plaist à Dieu vous reseruer en ce monde, à songneusement peser la grande enormité de vostre faute, afin que par ce moyen estant vostre corps ici puni selon la volonté & iuste iugement de Dieu, vous receuiez plus volontairement ce tourment, ayant recours à sa misericorde, laquelle il vous ottroyera si voulez vo<sup>9</sup> retourner à luy, & ne vous imputera point la faute si abominable, qu'avez commise cōtre luy:

B.iii.

ne mesmes vne infinité d'autres, par lesquelles à bon droit vous meritez d'estre abyssmé iusques au pl<sup>o</sup> profond des enfers. Ces saints propos de ceste vertueuse Dame, ne peurent tant faire, que ce miserable vint à recognoissance aucune, ains taschoit tousiours à s'excuser & pallier son crime, disant comme au parauant, qu'il n'auoit tué son pere. A quoy luy fut repliqué par le precepteur susdict, qu'il n'estoit plus temps de penser rien profiter par telles denegations & desguisemés de son crime: car le proces en estoit tellement fait & parfait, & le crime si bien auéré, que sentence de mort s'en estoit ensuiuie, qui mesmemét luy auoit esté prononcee, & de laquelle il s'estoit porté pour appellant: Que Madame ni sa compagnie n'estoit allee là pour luy faire des interrogatoires, ains seulement pour le cōsoler, l'admonester de son salut, & l'amener au bon chemin, duquel il estoit totalement esgaré. Qu'il falloit donc en premier lieu, qu'il entraist à bon escient en la cōsideration de son peché, qu'il descendist en sa cōscience, & que luy-mesme se fist iuge de sa faute. Car d'esperer par quelque moyen

obtenir remission des hommes, ce seroit en vain : estant ce crime tant detestable, qu'un Payen mesmes ne voulut ordonner aucun supplice cōtre les paricides, disant, qu'il ne pensoit point qu'aucun peust estre tāt desnaturez, qu'une telle impieté & felonnie luy peust venir en la pensee & en l'entendement. Si vous eussiez esté (luy disoit-il) bien nourri en la crainte de Dieu, & bien instruit en sa Loy, vous eussiez appris qu'il vous falloit honorer vostre pere & vostre mere: afin que vos iours fussent prolongez sur la terre. C'est donc bien à dire, que ceux qui ne les honorerōt point, n'auront pas longue vie en ce monde. Et vous, non seulement vous n'avez point honoré vostre pere, mais vous l'avez malheureusement meurtri & occis. Que pouuez-vous donc attendre autre chose, sinon vne mort cruelle & honteuse, par laquelle vos iours soyent accourcis sur la terre? Car Dieu n'est pas menteur. Mais en la Papauté vous ne tenez conte des Commandemens de Dieu, & faites bien plus grand cas des inuentions & resueries des hommes. N'y dit-on pas ordinairement, que quand on a esté à la

Messe, on ne peut mal faire de tout le iour? Aduisez maintenant s'il est vray. Reconnoissez donc vostre grand peché, & cōsiderez comme pour n'auoir point prié & inuoqué Dieu iournellement à vostre aide, il vous a abandonné, & vous l'avez oublié: il vous a laissé aller apres vos affections meschantes & desordonnees, iusques à auoir commis vn si horrible peché. Que si vous l'apprehendiez comme il appartient, les cheueux vous dresseroyét en la teste: voire vous trembleriez incessammét de frayeur, & vous estimeriez indigne de regarder la lumiere du Soleil. Comment? Depuis ce meurtre tant detestable, ne vous estes vous point représenté deuant vos yeux vostre pource pere tout sanglant du coup de vostre espee, dont vous luy avez trāspéré le corps? Ne vous a-il point semblé qu'il vous redemandoit la vie qu'il vous a donnée, puis que vous luy avez osté la sienne que ne luy auiez donnée? Si cela vous estoit bié imprimé en l'entendement & au cœur, non seulement vous ne seriez appellant de la sentence qui vous a ce iourd'huy esté pronōcée, mais aussi vous iugeriez la punition & le

le supplice estre trop leger au regard de vostre meſchâceté: vous deſireriez (di-ie) qu'on vous arrachaſt aujourd'huy vn membre, & demain l'autre. A ce propos fut dit par ledict priſonnier, qu'il auoit touſiours prié Dieu pour ſon pere, depuis qu'il auoit eſté mis en priſon, afin que ſondict pere ne mouruſt. Voire mais (luy dit-il) ce n'a pas eſté donc pour apprehenſion qu'ayez eu de voſtre offenſe, ains pluſtoſt de peur que ne fuſſiez puni en voſtre corps par les hommes, ſentant bien en vous-mesmes (quelque beau ſemblant que faciez) que s'il venoit à mourir (comme il a fait) qu'en ſa mort vous eſtoit ap-preſté vne mort cruelle & ignominieuſe. Ah, reſpondit-il, ie m'en fuſſe bien fuy ſi i'euſſe voulu: & mon pere meſme ſe ſentât bleſſé, m'en ſollicitoit, mais ie ne voulus onc y entendre. Là deſſus luy fut remonſtré, qu'il n'eſtoit en ſa puiffance de mouuoir ſeulement le bout du doigt, ſi non d'autant qu'il plairoit à Dieu luy en faire la grace: & pourtant qu'il recognuſt que ç'auoit eſté ſa volôté qu'il fuſt au lieu où il eſtoit, afin d'eſtre amené à la cognoiſſance de ſon peché, & en eſtre puni en ce monde pour ſeruir d'exemple de ſa



iustice. Qu'il deuoit donc auiser à en faire  
 son profit, & la prison luy seruir d'escho-  
 le, pour recognoistre que Dieu a en haine  
 le peché, desployant ses iugemens quand  
 bon luy sembloit sur les iniques, soit par  
 le moyen des Magistrats, ou autrement.  
 A quoy il ne respondit rien, sinon que  
 pressé par plusieurs semblables propos,  
 pour de plus en plus luy aggrauer sa fau-  
 te, dist finalement qu'il auoit le cœur si  
 gros & si brullât, qu'il n'estoit pas croya-  
 ble, & ce pendant faisoit quelque conte-  
 nance, tant de la teste que des mains, par  
 laquelle on s'apperceuoit aucunement  
 que Dieu commençoit à besongner en  
 luy: qui fut cause qu'on vint à luy propo-  
 ser la misericorde de Dieu, comme ia au  
 parauât auoit esté fait. A quoy fut adiou-  
 sté aussi, que souuēt l'infirmité de la chair  
 apprehendoit tellement la grandeur des  
 tourmens, que les malfaiteurs & crimi-  
 nels, encore qu'en leurs consciences ils se  
 sentissent bien dignes d'une grande pu-  
 nition corporelle, que neantmoins ils de-  
 nioient ordinairement le faict, tant qu'il  
 leur estoit possible, pour euter les tour-  
 mens qu'ils sauent leur estre appareillez:  
 mais que ceux, qui sont touchez du senti-

ment de leurs fautes, se retirans sous les ailes du Seigneur, aisément mettoyét bas toutes ces frayeurs & espouuantemens de la chair, estans fortifiez par l'Esprit de Dieu, qui leur allége les tourmens, quelques cruels qu'ils soyent au iugement des hommes. Penſez-vous (luy disoit-on) que tant de gens de bien, seruiteurs de Dieu, qui ayans bien lōg temps esté miserablement detenus & traitez rigoureusement és basses fosses, pour ne vouloir adherer aux idolatries de la Papauté, ayent senti vne telle violence & cruauté comme il sembloit? Nenni, nenni: car ils n'eussent si constamment souffert tels tourmens. Ne doutez point donc, que si vous confessez à Dieu vostre peché, & que luy demâdiez pardon, aide & assistance, qu'il ne vous fortifie pour endurer tous les plus cruels tourmens du monde, comme s'ils estoyét tresaisés à porter. Quelcun de la compagnie luy dit aussi, Or ça, mon ami, si on vous demande si vous estes Chrestien, ie m'asseure que vous direz qu'ouy: mais si on vous demande que c'est de l'estre, ie pense que ne sauriez que respōdre. C'est, dit-il, de faire les Commandemens de Dieu. Ce n'est pas mal dit, mon ami: mais

il faut que vous sachiez que les hommes ne les peuuent tellement faire, qu'ils ne demeurent tousiours redeuables au iugement de Dieu : car de leur nature tous sont meschans, cōceus & nais en peché, de façon qu'il n'y auroit personne qui se peust vanter d'estre Chrestien. Voila, mon ami, que c'est de la Papauté : on n'y monstre point à cognoistre Dieu ni à le seruir. Lors luy fut sommairement dit, que le Chrestien estoit celuy, qui auoit vne certaine & ferme assurance, que Dieu a enuoyé son Fils nostre Seigneur Iesus Christ en ce monde, pour nous remettre en grace avec luy, d'autant que nous sommes tous pecheurs, & par consequent ses ennemis, qui ne meritons qu'une ruine & perdition eternelle, & estre à iamais priuez de la vie & ioye celeste : & qu'à ceste cause les vrais Chrestiens ont sans cesse recours à prier ce bon Dieu pour obtenir remission de leurs pechez, par le moyen de son Fils nostre Seigneur Iesus Christ, qui a payé leurs debtes, & a satisfait pour eux. Sur cela luy fut demandé s'il prioit Dieu. Il dist qu'ouy : mais ne sachant dire par le moyen, ni au nom de qui (selon que le porte l'ignorance de ceux qui sont nour-

ris en la Papauté) luy fut remonsté qu'il n'y a qu'un seul Aduocat, par le moyen duquel nos requestes soyent agreables à Dieu, & qu'il ne se falloir adresser à autre pour estre exaucez de nos prieres, sinon à Dieu seul: qui nous a tant aimez, que d'auoir enuoyé son Fils en ce monde, pour nous deliurer des liens du diable, & nous racheter de mort eternelle. Que c'estoit donc en son Fils, que sa grace & misericorde estoit espendue sur nous: & pourtant qu'il ne falloir auoir recours à Dieu, sinon en son Fils, d'autant qu'il n'y auoit autre moyen. Or d'autât que le faulsaire, duquel nous auons parlé ci dessus, estoit tellement desbordé & abruti, que n'ayant aucun souci ne pensémēt de l'estat aduenir, mettoit en teste à ce poure parricide de faire bonne chere, en prolongeant sa vie par tous moyens, disant qu'aussi bien falloir-il mourir vne fois, & que ce pendant ne falloir apprehender aucun chagrin: Madame l'Amirale s'adressa à luy avec horribles menaces du iugement de Dieu, puis qu'il ne vouloit tenir autre cōte de son salut, & encore corrompoit ce poure parricide: lequel au contraire il deuoit plustost admonester de se retourner



à Dieu, selon qu'il estoit beaucoup plus aagé que luy. Et sur ce on luy demâda s'il pensoit auoir vne ame qui deüst viure apres la mort de son corps: à quoy respondit qu'il n'en sauoit rien, dont il fut aigrement repris & tancé de route l'assistance: de sorte qu'il commença vn peu à tenir autre lâgage. Adonc interrogé s'il croyoit qu'il y eust vn Dieu, respondit qu'ouy: mais ne seut onc dire plus auant, ne declarer aucunement que c'est qu'il entendoit par ce mot de Dieu. On luy remonstra grossièrement, & en peu de paroles, que Dieu estoit vëgeur rigoureux de l'iniquité, punissant les meschâs, tant en ce monde par supplices temporels, qu'apres ceste vie par vn tourment indicible, tant du corps que de l'ame eternallemēt. Ce fait, Madame l'Amirale exhorta finalement ce poure parricide de bien ruminer les propos qu'il auoit ouis: lesquels il respondit auoir volontiers entendu, & la remercia treshumblemēt, ensemble toute sa compagnie, priant Dieu luy donner bōne vie, ensemble à Monseigneur l'Amiral & à toute sa maison. Madiète dame s'estant retiree, fut encore aduertie particulièrement ledict parricide, de bien penser à sa



conscience, & prier Dieu d'ardente affection qu'il luy assistast: & aussi croire, que Madame l'Amirale & tous ceux qui estoient allez le visiter pour l'admonester de son salut, estoient autant d'Anges que Dieu luy adressoit, afin de l'amener & conduire au droit chemin de la vie bien-heureuse. Ce qu'il monstra trouuer bon, tant par sa response qu'autres signes, disant ces mots, & en les redoublant, Dieu doint bõne vie à Madame, & à toute sa famille: ie la remercie treshumblement & vous aussi. Apres Madame l'Amirale auisa, que le mieux seroit de mettre à part l'autre prisonnier, afin qu'il ne continuast à communiquer son poison au pource parricide, lequel donoit quelque esperance de meilleur propos qu'au parauant, quand ce Satan seroit sequestré d'avec luy. Bien tost apres que Madame l'Amirale se fut retiree, & que le geolier ayant par son commandement separé ces deux prisonniers, & mis ledict parricide en la prison criminelle de la tour, il pensa de plus pres aux propos qu'on luy auoit tenus: & comença à cõfesser en presence d'iceluy geolier, & d'un parcheminier de la ville son parent, qu'il auoit grãdement offensé Dieu,

d'autant qu'il auoit malheureusement tué son pere, & qu'il auoit biē meritē la mort: & pourtāt qu'on enuoyast querir le Bail-  
 lif, pource qu'il se vouloit desister de son  
 appel. Dequoy les susdicts prindrent oc-  
 casion de l'exhorter à bien faire son pro-  
 fit des sainctes remonstrances que luy a-  
 uoit faites Madame l'Amirale & sa com-  
 pagnie, & qu'à leur auis il faisoit tresbien  
 de renoncer à son appel, pource qu'aussi  
 bien ne pouuoit-il eschapper la mort: &  
 mesmement qu'il y auroit danger, qu'e-  
 stant mené à Paris, la Cour de Parlement  
 ne réforçast la rigueur de sa peine. Com-  
 me ces choses se disoyent, y arriua mon-  
 sieur Meller, Ministre de la Parole de  
 Dieu en ladicte maison: lequel prenant le  
 propos, commēça à exhorter iceluy par-  
 ricide en ceste sorte, Mon ami (luy dit-il)  
 si vous pēsez que vostre appel vous puisse  
 seruir à quelque chose de bon, il ne seroit  
 pas raisonnable qu'aucun vous en dissua-  
 dast. Mais le principal pensēmēt que de-  
 uiez auoir à ceste heure, c'est de bien exa-  
 miner vostre conscience deuant Dieu, &  
 auoir vn vray sentiment & desplaisir de  
 vostre iniquité. Car c'est peu d'auoir tant  
 seulement affaire aux hommes, pour estre  
 iugé

iugé & mis à mort par iceux, au pris de comparoistre deuant le siege iudicial de Dieu apres ceste vie presente, pour ouir prononcer de sa bouche vne sentence si cruelle & si rigoureuse que celle, par laquelle il enuoye les pecheurs & iniques à la gehéne du feu, où il y a pleur & grincement de dents à perpetuité : sinon que premierement ils se conuertissent à luy, ayans vne vraye repétance dedans le cœur de l'auoir offensé, & luy demâder pardon en ferme fiâce d'estre exaucez en son Fils nostre Seigneur Iesus Christ. Or nostre Seigneur Iesus Christ est venu au monde, ayant esté fait homme au ventre d'une Vierge, & ce par l'operation du S.Esprit: voire homme côme l'un de nous, excepté peché, afin qu'il portast sur soy le fardeau de nos iniquitez, & no<sup>s</sup> acquitast par son obeissance & iustice de tout ce, dont nous estions redeuables au iugement de Dieu son Pere, à cause du peché. Voila pourquoy Iesus Christ dit en son Euāgile, qu'il est venu au monde pour annōcer bonnes nouuelles aux hōmes, pour guerir les malades, pour illuminer les auēgles, pour desliier les prisonniers, & consoler ceux qui pleurent. Mais il vous faut entendre, que c'est vn pleur de l'ame, qui est vraye-

mēt desplaisante d'auoir offensé son Dieu & que telles promesses n'appartiennent qu'à ceux qui se recognoissent poures pecheurs deuant Dieu, & qui esperent en sa misericorde. Car Iesus Christ dit en vn autre lieu, qu'il n'est point venu pour les sains, mais pour les malades: qu'il n'est point aussi venu pour les iustes, mais pour les iniustes: en quoy il signifie, qu'il n'a espandu son sang que pour ceux qui recognoissent en auoir besoin, & nō pas pour ceux qui estimēt ou presumēt auoir quelque autre lauement que cestui-là, ou bien le mesprisent & n'en tiēnent conte. Il n'y a point donc de doute (mon ami) que si vous-vous retournez à luy. avec vn tel pleur & gémissement q' i'ay dit, & qu'embrassiez sa misericorde en ferme fiance, la luy demandant au Nom de son Fils bien-aimé, qu'il ne vo<sup>9</sup> reçoieue à merci, & qu'il n'oublie toutes vos fautes: & mesmemēt ceste derniere qu'avez faite, qui est vn acte si vilain & si estrange, qu'il n'est possible de plus. Alors il respondit qu'il estoit vray, & qu'il auoit tué son pere: mais qu'il en demandoit pardon à Monseigneur l'Amiral & à la Iustice. A quoy luy fut repliqué par ledict Ministre, que la principale faute qu'il auoit faite, estoit contre Dieu



auquel il en falloit demander pardon. Comment mon ami (luy dit-il) ne reconnoissez-vous point encore l'enormité de vostre faute, qui est si grande deuant Dieu, veu que vous auez tué vostre pere? Celuy (di-ie) que vous deuiez honorer & alimenter, vous l'auiez mesprisé, & cruellemét occis: vous auez osté hors du monde, celuy qui vous y auoit mis. Il est vray, respondit-il, i'ay tué mon pere: i'en demande pardon à Dieu, & le prie qu'il ait pitié de moy. Ce que voyant ledict Ministre, & qu'il comméçoit à se reconnoistre par le sentimét de sa faute, print occasion de luy proposer la misericorde de Dieu par diuers exemples, cōme celle d'Adam, quand le Redépteur luy fut promis: comme celle de Dauid, quand il reconnut son crime d'adultere: item celles du brigād & de S. Paul, afin de luy imprimer au cœur vne vraye asseurâce de la bonté de Dieu, & par ce moyen appaiser sa pource conscience. En apres luy demanda s'il ne seroit pas bien aisé qu'il fist les prieres selon qu'on les fait ordinairement en l'Eglise reformee. Il respondit qu'il en estoit bien content. Lors il fit la priere, laquelle il accommoda à l'exigence du temps, du lieu, & de la personne à qui il auoit affaire. Ce



qu'estât fait, ledict parricide replica par deux fois qu'il demandoit pardon à Dieu de bon cœur, & pria ledict Ministre ne l'abandonner point: ce qu'il ne fit encore. Lors luy fut donné vn petit liure de Prières en François, afin qu'il fust dressé pour sauoir prier Dieu: mais il respondit qu'il ne sauoit lire qu'vn bien peu: ce qu'il monstra aussi tost par experience. Ainsi que le Ministre cōtinuoit à l'exhorter, il luy dit, qu'il se sentoit grandement allegé depuis qu'on l'auoit osté d'avec l'autre prisonnier. Vous ferez (luy dit-il) encore bien plus aise quād Dieu aura osté vostre ame de la prison de vostre corps, & qu'il vous aura affranchi de toutes les miseres & calamitez de ceste vie presente, & mesmes du iugement rigoureux qu'il desployera sur les incredules & rebelles à sa Parole, pour vous faire iouir d'vne liesse perpetuelle au Royaume des cieux: où vous le verrez face à face, accompagné de ses Anges & de ses eleus: desquels maintenant il vous aduouë, puis que vo<sup>9</sup> esperez en luy. Ha! ie voudrois (dit-il) que nous fussions desia à Lundi: n'a-on pas enuoyé querir monsieur le Baillif? Car ie veux renoncer à mon appel. Sur quoy ledict Ministre continuant ses saintes exhortations, &

luy persuadant de continuer à se bien disposer à la mort comme il en prenoit bien le chemin, pour l'esmouuoir à quitter encore plus franchement ceste vie, luy fit encore vne petite repetition des miseres qui sont en icelle. Sur quoy ledict prisonnier commença à luy reciter l'histoire d'une fille qu'il nomma, laquelle (ainsi qu'il disoit) auoit esté tellement battue de son maistre, & par maniere de dire, pour rié, qu'il luy auoit renuersé l'os de l'espaule, dont elle enduroit si grâde douleur qu'elle crioit incessammét, sans pouuoir trouuer repos quelcōque : disant que si la fille enduroit tât de mal pour n'auoir rien fait, que luy qui en auoit tant fait, deuoit donc bien endurer : voulant confermer par tel recit ce qu'auoit dit le Ministre touchant les calamitez de ceste vie. Puis oyant parler des tourmés que Christ auoit enduré au monde pour nos iniquitez, respondit qu'il estoit vray, & qu'il auoit esté trahi, pris prisonnier, lié, flagellé, bufferé, couronné d'espines, & finalement crucifié & mort. Et en la fin de ces propos dit qu'il se sentoit bien-heureux. Sur quoy arriva le Baillif, auquel il dit de prime face qu'il renōçoit à son appel. A quoy ledict Baillif fit responce qu'il le receuoit dès lors:

D.iii.

mais qu'il falloit attendre l'exécution de sa sentence iusques au Lundi prochain, d'autant qu'on n'auoit accoustumé de la faire és iours de Dimanche. Il respondit qu'il l'attendroit donc. Et lors pria derechef le Ministre de ne l'abandonner point. Le Baillif luy dit qu'il ne demeureroit seul, & qu'il luy laisseroit tousiours quelcun pour le consoler. Dont pour cest effect y laissa vn ieune compagnon ferrurier, homme charitable & craignât Dieu, lequel coucha toute la nuit en la prison avec ledict parricide. Puis se retira ledict Baillif & le Ministre, & le recommanderent à Dieu: l'exhortant d'estre memoratif des propos qu'il auoit ouïs, & de prier Dieu souuēt, afin qu'il luy assistast par son S. Esprit: luy promettans que bien tost ils retourneroyent pour le visiter. Ainsi la nuit se passa iusqu'au lendemain Dimanche, durant laquelle (ainsi que rapportoit le ferrurier) il auoit souuēt prié Dieu avec souspirs & gemissemēs. Enuiron les huit heures du matin, il y eut vn gentilhomme domestique de la maison de mondict seigneur l'Amiral, & Ancien de l'Eglise de Dieu en ceste mesme famille, qui monta en la tour où estoit ledict prisonnier, afin de le visiter & admonester de son salut

(selō que porte le deuoir d'un Chrestien, & principalemēt ayant charge en la maison de Dieu : ) auquel il dit en substance, qu'il estoit merueilleusement contristē & desplaisant de l'enormité de sa faute, mais qu'il estoit encore plus ioyeux de la repentance que Dieu luy auoit donnée, & de l'assurāce qu'il auoit engrauee en son cœur qu'il luy pardonnoit ses pechez : & notamment ce crime si detestable d'auoir tué son pere, selon qu'il luy en auoit demandé pardon, & qu'il s'estoit conuertī à luy. A quoy il respondit que veritablemēt il auoit tué son pere, & qu'il auoit grādemēt offensé Dieu & les hommes : mais qu'il auoit plusieurs fois demādē pardon à Dieu, qu'il luy demandoit derechef, & qu'il se confioit en Dieu qu'il luy pardonneroit. Sur ce propos ledict Ancien luy remonstra la grande ignorance & impieté en laquelle on l'auoit nourri en l'eglise Romaine, & qu'au lieu d'y auoir appris à seruir Dieu purement selon sa Parole, on luy auoit appris d'aller à la Messe, où il n'entendoit rien, puis fleschir le genoil deuant du bois & de la pierre : inuoker ceux qui sont morts, prier pour les trespassez, croire au purgatoire, & à vn tas d'autres fatras dont on y abuse les pources



gens : mais qu'il estoit bien. heureux que Dieu l'auoit retiré hors de telle abomination : voire sur la fin de ses iours (& apres auoir commis vn acte si estrâge, que mesmes on doit auoir horreur de le nommer entre les hommes) luy ayant reuelé son Fils nostre Seigneur Iesus Christ, le sang duquel estoit sa vraye satisfaction & appointment avec luy: & pourtant qu'il ne deuoit donc plus s'attendre à tous ces badinages pour aller en la vie eternelle, puis que Dieu luy presentoit son Fils, pour recouurer en iceluy seul tout ce qui luy estoit necessaire à salut, comme desia on luy auoit enseigné. Sur quoy il respondit qu'il esperoit en Dieu tant seulement, & en son Fils Iesus Christ, & qu'il leur demandoit pardon. Dit dauâtage, qu'il n'auoit onc receu tant de ioye en sa vie, qu'il auoit fait depuis que Madame l'Amirale & sa compagnie l'auoyent visité en la prison, & qu'il estoit tout prest d'endurer la mort quand il plairoit à la Iustice. L'Ancien luy fit lors entendre la grande ioye qu'auoit receu toute l'Eglise de Dieu qui est audict Chastilló, laquelle s'esioiissoit avec les Anges de sa conuersion à Dieu. Qu'il s'esioiissoit aussi de le voir, si bien resolu de mourir en Dieu, l'estimât bien-  
heu-



heureux de vouloir franchement quitter la terre, pour aller au ciel avec Dieu, & qu'aussi bien la vie presente (comme en parle le Prophete) n'estoit autre chose que peine & martyre, voire au milieu de ses plus grans delices : mais qu'avec Dieu on y receuoit vn perpetuel contentement & vne ioye indicible. Luy remonstra aussi comme Satan (selon qu'il est ennemi du salut des hommes) auoit accoustumé, lors qu'il voyoit l'œuvre de Dieu s'auancer en quelcun des siens, de ietter d'autant plus furieusement ses astuces & cauteles, afin de renuerfer tout, s'il luy estoit possible: & pourtant qu'il se deuoit preparer à bon escient au combat par le moyen de la foy, afin de repousser ses assauts. Que si Satan luy mettoit en auant la multitude de ses pechez, & notamment qu'il auoit tué son pere, afin de l'attirer en desfiâce de la misericorde de Dieu, qu'il ne s'estonnast point pour cela: car ce n'estoit que sa coustume, ains qu'il eust son recours à la promesse de Dieu, laquelle estoit infallible, d'autant qu'il ne laissoit quelque sienne œuvre imparfaite, quand vne fois il l'auoit commencee en qui que ce fust : & luy recita là dessus ces vers de Dauid, Et parferas mon cas tout seur, Car ta douceur la-

mais n'abbaiſſes . Ce qu'une fois as commencé, Et auancé, Tu ne delaiffes. Là deſus arriua le Miniſtre, qui au parauant l'auoit exhorté, lequel prenant le propos, commença à le cōſoler & admonester de plus en plus . Apres on luy apporta à deſiuner, & le fit-on ſortir de la priſon pour le faire manger : cē qu'il ne voulut faire, ſans que preallablemēt on euſt prié Dieu. Ce pendant qu'il deſiunoit, l'Ancien ſuſdict luy fit lecture de l'oraïſon que noſtre Seigneur Ieſus Chriſt fit à Dieu ſon Pere vn peu auant qu'il mouruſt, afin de luy cōfermer d'autant mieux l'aſſurance qu'il auoit priſe en la miſericorde de Dieu. Puis le recommanda à la grace de Dieu, & ſe retira, y laiſſant le Miniſtre, qui ne perdoit point de tēps, ains profitoit tousiours en la reduccion de ce pource ieune homme. L'apreſdisnee Madame l'Amirale le fut encore voir, laquelle trouua en luy vn merueilleux changement, reſcognoiſſant que Dieu s'eſtoit ſerui d'elle, & de ceux qu'elle auoit menez pour le ſalut d'iceluy: dont elle loua Dieu, & exhorta ce pource homme, de bien continuer en ce que Dieu auoit ſi heureuſement commencé en luy . Il la remercia de ſa bonne & ſaincte remonſtrance, & ſinguliere-

ment du grand bien qu'elle luy auoit fait,  
d'auoir osté l'autre prisonnier d'avec luy.  
Le Lundi ensuiuant, viij. du mois d'Octo-  
bre, madiete Dame l'Amirale le fit ame-  
ner à sa requeste en sa salle, enuiron les  
neuf heures du matin, pour y entendre le  
Sermon, qu'on y fait communemēt trois  
iours de la semaine, & autres trois iours  
en la ville: & apres le fit garder en vn au-  
tre lieu prochain de là, pource qu'aussi  
c'estoit le iour de son execution. Il dit a-  
pres auoir ouy le Sermon, qu'il estoit plus  
aise que iamais, & beaucoup d'autres bōs  
& saincts propos. Apres disner chacun  
l'alloit voir pour le consoler, & admone-  
ster tousiours de son deuoir: mais il ren-  
doit vn chacun esmerueillé de la grande  
constance & assurance qui estoit en luy,  
& des saincts propos qu'il tenoit. Madam-  
e l'Amirale y fut aussi avec force gen-  
tilshommes, damoisselles, & autres de sa  
famille, où furent amenez aussi Messieurs  
ses enfans par leur precepteur susdict. Il  
est à noter, que tant Madame l'Amirale,  
ses gentilshommes & damoisselles, & au-  
tres de sa famille, à qui Dieu a départi pl<sup>r</sup>  
de graces, firent tout deuoir d'admones-  
ter ce pource criminel, comme speciale-  
ment fit aussi vn des Ministres de la ville.

Or entre les autres saincts propos, & les plus dignes de memoire qu'il prononça deuant la compagnie susdicte, attendant l'heure d'estre mené au supplice, voici à la verité & en substance le recueil qui en a esté fait par gens d'honneur & d'autorité, & craignans Dieu. En premier lieu donc il se mit à faire vn discours de la bonté de Dieu, qui auoit enuoyé son Fils nostre Seigneur Iesus Christ ici bas pour le salut des hommes, l'ayant liuré à la mort pour leur redemption. Là dessus (& selon que portoît encore la rudesse de son langage) il recita fort simplement la mort & passion de nostre Seigneur Iesus Christ: mais ceste simplicité monstroit bien qu'il y auoit vn Docteur là dedans, qui luy en auoit beaucoup appris en peu d'heure. Il dit dauantage, Iesus Christ Fils de Dieu eternal, & Dieu luy-mesme, est mort pour nos pechez, luy iuste pour les iniustes. Ne doy-ie dōc pas bien mourir, moy qui suis si meschant & miserable, & qui ay tué mon pere? Puis reprenant son propos, sur ce qu'il auoit dit que Iesus Christ, qui estoit Dieu luy-mesme, estoit bien mort, dit, qu'entāt que Iesus Christ estoit Dieu, qu'il ne mourut point: car il viuoit eternellement avec Dieu son Pere: mais



entât qu'homme, qu'il estoit mort & res-  
 suscité pour nostre redemption . Il dit sur  
 ce mesme propos à Madame l'Amirale,  
 Madame , vous auez beaucoup d'enfans,  
 mais vous seriez bien marrie d'en donner  
 vn à la mort pour m'en retirer, ni moy, ni  
 tous ceux qui sont ici:& Dieu, qui n'en a-  
 uoit qu'un , l'a bien donné pour nous ra-  
 cheter de la mort eternelle . Il dit incon-  
 tinēt apres, que le diable auoit bien com-  
 mencé pour le perdre, luy ayant fait faire  
 vne telle meschanceté que d'auoir tué son  
 pere : mais qu'il n'acheueroit pas par la  
 grace & bōté de Dieu, & que Dieu estoit  
 beaucoup meilleur ouurier que luy, d'au-  
 tant qu'il se seruoit mesmement de ses  
 meschâtes œuures pour le salut des siens,  
 comme il se voyoit en son exemple . Là  
 dessus il se mit à parler de la puissance de  
 Dieu,& de la merueille de ses œuures, di-  
 sant qu'il auoit basti sa redēption en deux  
 ou trois iours qu'il luy auoit donné sa co-  
 gnoissance : alleguant à ce propos , que si  
 les maistres maçons besongnoyent aussi  
 diligemment, qu'ils gagneroyent beau-  
 coup, quād en peu de temps ils auroyent  
 dressé vn bien grand edifice. Mon arbale-  
 ste(dit-il) est bādée,& si vise au droit but.  
 Mon ame est mon arbaleste , & Dieu est



mon vray but auquel ie tends. En ces entrefaites, il demâdoit souuent à Madame l'Amirale quand ce seroit qu'il partiroit de là pour s'en aller au ciel là sus avec Dieu son vray Pere. Ie ne crains point la mort, disoit-il, c'est le plus grand bien qui me puisse aduenir. Puis ayant veu entrer quelques enfans de la ville, il se mit à leur prescher l'obeissance de Dieu & de ses Commandemēs, & la reuerence deuē aux peres & meres: exhortant & les vns & les autres de profiter en son exēple: & nomma particulièrement trois ou quatre desdicts enfans, entre autres vn appellé Baron, assez mal conditionné, & desobeissant à sa mère, auquel il fit vne fort belle & gracieuse remonstrance. Pendant ces discours il fit vne requeste à Madame l'Amirale, assauoir que son corps fust enterre après sa mort, disant qu'il ne demâdoit point cela pour son regard particulier, ains plustost pour cacher l'ignominie & les reproches qu'on pourroit faire à ses parens à cause de luy. Mais luy estant remonstré qu'il ne deuoit plus penser à la chair qui n'estoit que corruption, & laquelle toutefois se retrouueroit toute entiere au iour de la resurrection, mais qu'il deuoit auoir son esprit tousiours fiché en

Dieu, & en Iesus Christ son Fils, qui l'attendoit pour le receuoir au ciel avec ses Anges, & le rédre à iamais bien-heureux en la vie. eternelle, il se submit fort doucement à cela. Adonc Madame l'Amirale luy fit lecture du Pseaume de Dauid, qui se cômence, Mon ame en Dieu tant seulement Trouuë tout son contêtement, &c. Et puis luy fut faite incontinent apres par l'Ancien, dont il a esté parlé ci dessus, celle du 51. qui se commence, Misericorde au pouré viciëux, &c. Et à chacune sentence desdicts deux Pseaumes, où il estoit fait mention de la misericorde de Dieu, du renouvellement de son S. Esprit, & qu'il est le roc asseuré des fideles, il les confermoit toutes par ses gestes, & par ces mots, Ainsi soit-il. En apres il dit aussi à vn qui luy preschoit la fiance qu'il deuoit auoir en Dieu par Iesus Christ, Cuidez-vous (dit-il) que ie ne l'aye pas? Qui est-ce qui me fait tenir tous ces propos que ie vous di, qui me les a appris, n'est-ce pas Dieu seul? Estimez-vous que ce soit moy qui parle à vous? Non, non, c'est Dieu qui parle en moy par son S. Esprit. Je ne suis plus ici, il n'y a plus que mon corps, ie sen mon ame estre desia comme avec mon Dieu mon Pere, auquel i'ay telle fiance, que s'il

se presentoit deuant moy autant d'hommes & de diables qu'il y a d'estoilles au ciel, ils ne me sauroyent arracher la fiance que i'ay de mon salut en Dieu, par son Fils nostre Seigneur Iesus Christ. A l'issue de ces propos il eut soif, & demanda à boire. Lors on luy bailla vne couppe, où il y auoit autant d'eau que de vin: & tenat icelle couppe, dit ces mots à Madamel'Amirale, Madame, i'ay grand soif, mais ce n'est pas tant de ce vin ni de ceste eau que ie tiens, que de ceste vie eternelle que Dieu me garde. Et là dessus beut à elle & à toute la compagnie, se recommandant aux prières d'un chacun. Priez Dieu pour moy, disoit-il, tandis que ie suis au monde: car apres ma mort ie n'en auray plus que faire, estât là sus au ciel avec mon Dieu mon Pere & mon Sauueur, viuant & regnant eternellement. A l'instant mesme, qui estoit enuiron deux heures apres midi, voyât arriuer le Baillif du lieu avec la Iustice qui le venoit querir pour le mener au supplice, luy demâda aussi tost, Et bien monsieur le Baillif, tout est-il prest, irons nous maintenant? allons quand il vous plaira, car me voila prest. Alors ledict Baillif (selon qu'il est homme droict & craignant Dieu) luy fit vne fort belle & sain-

saincte remonstrance, pour l'encourager de mettre tousiours son espoir en Dieu, comme il auoit si bien comencé. Et comme on l'emmenoit, il se remit à parler de Dieu, annonçant ses misericordes & compassions à toute l'assistance, & tenant de si bons & saincts propos, voire les disant avec telle grace & asseurance, qu'il esmouuoit vn chacū à pleurs & larmes. Dequoy s'apperceuant, il commença à dire, Pourquoi pleurez-vous? vous voyez que ie ne pleure point, & si m'en vay à la mort. Ainsi en continuant ces saincts propos, il chemina avec grande asseurance iusques en la place publique, où la merueilleuse constāce & asseurance dont il estoit plein attiroit tant de gens, & es chambres & greniers d'alentour, que c'estoit merueilles des gēs qui y abordoyent. Estāt monté sur l'eschaffaut, & que desia le bourreau auoit commecé de le lier, il se mit à faire vne belle & saincte remonstrance à tout le peuple, contenant en substance la reuerence qu'on doit porter à Dieu & à ses saincts Commandemens. Item comme les peres & meres doiuent estre songneux à bien instruire leurs enfans au seruice de Dieu, les exhortant de les enuoyer ouir sa Parole en nostre Eglise, qui estoit l'es-



chole de Iesus Christ: les chastier à bon  
 esciét dès leur ieunesse, & ne leur lascher  
 la bride pour suivre leurs plaisirs & vo-  
 lontez comme il auoir fait. Puis vne ex-  
 hortation aux enfans de rendre mutuel-  
 lement le deuoir aux peres & meres, &  
 de profiter en son exemple, afin qu'ils ne  
 tombassent au danger d'une mort igno-  
 minieuse comme estoit la sienne. A l'issue  
 de ceste remonstrance sensuiuit incont-  
 nent la priere publique, qui fut faite par  
 le Ministre de la ville, lequel estoit môté  
 sur l'eschaffaut avec ledict parricide, pour  
 tousiours l'admonester en Dieu. Ceste  
 priere s'estendoit en general pour tous  
 hommes, pour l'Eglise du lieu, & spécia-  
 lement pour ledict criminel: durât laquel-  
 le tant Papistes que Huguenots estoient  
 prosternez en terre le bonnet au poing.  
 Ce qu'estant fait, ce ieune homme requist  
 qu'on châtast le Pseaume .x. dont on luy  
 auoir fait lecture au chasteau: & lors on  
 en chanta la premiere partie tant seule-  
 ment, aduisant qu'il suffiroit de cela. Du-  
 rant qu'on chantoit, il regardoit souuent  
 en bas près de son eschaffaut, le Ministre  
 & l'Ancien qui l'auoyent exhorté dedans  
 la prison: & nonobstât les frayeurs & di-  
 uerses apprehensions qui aduiennent or-



dinairement à la chair en telle perplexité, leur souf-rioit avec toute douceur, & leur monstroit le ciel du doigt, où il esleuoit à chacun coup les yeux. Le Pseaume estant fini de chanter, le bourreau commença à faire son office: & cōme il vouloit prédre le bras dudiēt criminel pour luy couper le poing, il luy tendit aussi franchement que si c'eust esté à vn barbier, duquel il n'eust deu recevoir qu'une simple saignée. Puis luy voulant bander les yeux, luy dit qu'il n'en estoit point de besoin, & qu'il n'auoit point de peur: toutefois le bourreau luy mit le bandeau deuant les yeux, pour garder (comme il disoit) la forme de Iustice: & luy ayant mis le poing sur le billot, luy couppa fort soudainement: dont la premiere parole qu'il dit apres, ce fut ceste-ci, Loué soit Dieu, loué soit Dieu: la misericorde duquel il reclamoit sans cesse, selon aussi qu'il en estoit exhorté par le Ministre de la ville, qui estoit aupres de luy. Or il est à noter, que durāt le temps de son supplice, & iusques à ce que le bourreau eust mis fin à son execution, que ce pource patient eut incessammēt Dieu & son Fils nostre Seigneur Iesus Christ en la bouche, & fut armé de telle constance & assurance, qu'il ne fle-

chit onc pour nul tourment : & mesmes  
 n'en changea point de visage, ains rédoit  
 tout le peuple esmerueillé de sa vertu &  
 magnanimité de courage. Ainsi donc se  
 passa son execution avec vne cōstance &  
 assurance beaucoup plus grande à voir  
 à l'œil, qu'on ne pourroit exprimer par es-  
 crits, & par laquelle on pouoit aisément  
 iuger que Dieu l'auoit enuironné de mer-  
 ueilleuses forces, pour paracheuer l'œu-  
 re qu'il auoit commencee en luy. Apres  
 ceste pitieuse executiō, & comme chacun  
 se retiroit en son quartier, on voyoit gens  
 s'en aller de tous costez, lamentans &  
 pleurans de la pitié & cōpassion que leur  
 auoit fait ce poure ieune homme en la  
 patience & cōstance de sa mort.

Voila donc au vray la conuersion de  
 Jean Guy parricide, & la cōstance de sa  
 mort: laquelle n'a point esté vaine, ains a  
 esté de grand fruit & vtilité à plusieurs,  
 voyans en icelle la grandeur du Seigneur  
 en ses œuvres, & la grande bonté dont il  
 est plein enuers les hommes. Mais pour  
 autant que le Seigneur se complaint par  
 son Prophete Esaie, de ce que les homes  
 ont incontinēt mis en oubli ses iugemēs,  
 qui leur sont enuoyez pour les attirer à  
 repentance, & au lieu d'estre retenus par

la crainte d'iceux en quelque deuoir de pieté, ne laissent neantmoins à suiure leurs meschantes & maudites affections, enseuelissans la memoire de tels aduertissemens par vne trop grande negligéce & stupidité qui est en eux, il sera bõ de faire ici vn brief recueil des fruiçts qu'on peut tirer de ceste histoire, afin d'en rafraeschir la memoire aux Lecteurs, & par ce moyé les conuier derechef à benir le Nom de Dieu, & luy donner toute gloire.

En premier lieu donc, on peut voir par l'exemple de ce parricide, combien est grãde la peruersité & corruption de l'hõme, & à combien de sortes de dangers il est suiet, quand il est delaiissé de Dieu en son naturel. Semblablement aussi quelle puissance Satan a sur luy, pour le faire trebuscher en perdition eternelle: sinõ qu'il soit conduit & armé des graces de Dieu & de son S. Esprit, pour estre retiré d'un tel labyrinthe & gouffre de mort. On peut semblablemēt ici considerer la grande misericorde & bonté de Dieu sur les hommes, ensemble la diuerse dispensation d'icelle: laquelle s'est monstree d'autant plus grande en ce pource ieune homme, qu'ayant esté toute sa vie vn meschant & idolatre, & finalement le meurdrier de

son pere, Dieu l'a neantmoins receu à merci en telle extremité: s'estant mesmement serui de sa faute si execrable, & de la meschâte œuvre du diable qui l'auoit poussé à ce faire, pour l'amener par vne telle voye au chemin de salut. Voila comment Dieu besongne par sa sagesse incompréhensible, en tirant du mal le bien, & des tenebres la lumiere: & aussi comme il se demôstre clemēt & pitoyable enuers les hommes, quand de sa pure & gratuite bonté il leur tourne à salut & ioye, ce qui autrement leur estoit venin & poison, & vn breuuage de mort eternelle. A luy seul donc soit gloire eternellement. Il ne faut omettre en cest endroit aussi que ceste mesme exemple doit estre vn bon aiguillon aux peres & meres, pour les solliciter de bien instituer leurs enfans en tout deuoir de piété, & les chastier de bōne heure comme il appartient, afin de ne porter quelque iour vn regret perpetuel en leurs cœurs, pour voir tomber leurs enfans si malheureusement comme cestui-ci: lequel par faute de bonne erudition & discipline, a esté exposé à la honte des hommes, par vne mort tant ignominieuse: afin aussi de ne voir mesme la ruine de leurs maisons, par vne semblable desolation, qui est



maintenant en la condition de ceste pou-  
 ure mere vefue, qui d'un seul coup a veu  
 la mort de son fils & de son mari, & par  
 consequent la ruine de sa maison: elle e-  
 stant demeuree seule chargee de trois pe-  
 tis enfans, & destituee de toute substance  
 & nourriture, quand le labeur de sondict  
 fils & mari (qui leur mettoit le pain en la  
 main) a pris vne fin si soudaine & si lamé-  
 table. Qu'il leur souuienne aussi commēt  
 il en prit à Ely le Sacrificateur pour auoir  
 espargné les enfans, & les auoir plus ho-  
 norez que Dieu: c'est qu'en vn mesme  
 iour Dieu les luy fit mourir tous deux en  
 bataille, & qu'au rapport qui luy en fut  
 fait incontinct apres, il cheut luy-mesme  
 de desplaisir à la renuerse, & se rompit le  
 col. Le mesme exemple de ce parricide,  
 doit aussi seruir d'une bride aux enfans,  
 pour les retenir en tout deuoir d'obeissan-  
 ce, tant enuers Dieu, qu'enuers leurs pe-  
 res & meres, afin d'euitier le courroux de  
 Dieu, & ne tomber en telle honte & con-  
 fusion que ce parricide: & comme aussi fit  
 Absalom fils de Dauid pour s'estre rebel-  
 lé contre son pere, qui par vn iuste iuge-  
 ment de Dieu demeura pēdu par les che-  
 ueux à vn arbre, au iour de la bataille qu'il  
 auoit liuree contre sondict pere, & fut



crucellement mis à mort par Ioab Prince de l'armee de Dauid.


Pour conclusion, c'est à faire à toutes personnes de faire leur profit des iugemens de Dieu, & les receuoir comme autāt d'oracles du ciel qui leur sont enuoyez pour les induire à repentāce, pour se conuertir à Dieu, & comme dir l'Apostre, se tenir tousiours sur leurs gardes, afin d'estre deliurez de la tyrannie de peché, de Satan, & de la mort eternelle, & obtenir la iouissance perpetuelle du Royaume des cieux par le moyen de Iesus Christ.

*Exode 33. Romains 9. 2.*

**J'auray merci de celuy à qui ie voudray faire  
merci, & feray misericorde à qui ie vou-  
dray faire misericorde.**


***Satan ici a fait un grand effort  
Pour attrapper ce poure parricide:  
Mais le Seigneur s'est monstré le plus fort,  
Chassant Satan, & sauuant l'homicide.***

**F I N.**











































1750  
12 21

1500  
1500

